

Heinrich Schmid – il bab dal rumantsch grischun – è mort

■ (anr) Professor dr. Heinrich Schmid è mort mardi saira nunspegadamain en la vegliadetgna da 78 onns a Turitg. Il defunct va en l'istorgia da la Rumantschia en spezial e da la Svizra quadrilingua en general sco bab dal rumantsch grischun. Per ses gronds merits en favur da quest linguatg unifitgà è el vegni undrà 1996 a Cuir a cun il Premi da la fundaziun Brandenberger. 1982 ha la Lia rumantscha incumbensà prof. Heinrich Schmid, da la Universitad da Turitg, d'elavurar directives per crear la lingua da scrittira cuminaivla per l'entir intschess rumantsch. Il resultat è stà: Il rumantsch grischun. Uschia è prof. Schmid daventà il funda-

tur dal linguatg rumantsch standardisà. Persuenter n'ha el betg racoltà be laud. I ha dà numerusas e vehementas cuntraversas. Il bab dal rumantsch grischun ha dentant era survegni blera renconuschientscha. El è stà in maister da l'avischinaziun linguistica en la Rumantschia. Perquai ha el la finala tuttina pudì registrar cun satisfacziun che las stentas pil rumantsch grischun han chattà adina dapli acceptanza ed applicaziun.

Heinrich Schmid, naschi 1921 a Turitg, ha studegià romanistica, indogermanistica e slavistica a las Universitads da Turitg e Genevra. Gia en sia dissertaziun è el s'occupà 1946 cun il rumantsch, siond questa intitulada



Heinrich Schmid è mort en la vegliadetgna da 78 onns. 10

«Zur Formenbildung von 'dare' und 'stare' im Romanischen». El ha habilità ed è daventà docent

privat a Turitg. Davent da 1966 fin 1983 è el stà professor extraordinari per filologia romana a l'Universitad da Turitg.

Heinrich Schmid ha era collaborà vid il «Rätisches Namenbuch» e tar il Dicziunari Rumantsch Grischun ed è stà commember e president da la cumissiun filologica dal DRG. El è era autor da numerus tractats scientifics. Uschia ha el survegni 1983 l'incarica da la regenza grischuna da far in'expertisa concernent la situaziun dal rumantsch en Svizra. Il fundatur da la lingua rumantscha unifitgada ha lavorà fin sia mort vid la creaziun d'in tal linguatg da standard era per ils Ladins da las Dolomitas.